

195200

鳳凰廳志

112326

鳳凰廳志

鳳凰廳志卷之九

屯防二

道光元年十月二十六日總督陳若霖巡撫左輔

奏爲遵

旨查辦苗疆事宜熟籌妥議恭摺覆

奏仰祈

聖鑒事竊

臣

等承准

廷寄道光元年四月初十日欽奉

上諭據刑部侍郎張映漢奏籌苗疆事宜一摺湖南苗疆

舊立章程原欲使苗民永遠樂業相安無事乃近日漸就廢弛如摺內所稱屯丁缺出屯官自以隨帶私人頂充其屯丁子弟轉致失業日久必啟爭端至苗疆租賦應從輕減俾安樂利但減租先須省費現在租穀支銷既多有名無實之款自應核實裁汰量入爲出以垂永久其七廳縣倉貯備旱潦之需如有虧缺更當嚴行查辦稍寬鹽禁以免苗人淡食亦可量爲變通至差役私人苗寨本干嚴禁應飭廳縣各衙門實力奉行苗額舉人例准一體會試當囑禁苗吏需索或酌給公車路費

俾知踴躍以上各條張映漢在楚體察較真着陳若霖
會同左輔逐一查明妥籌辦理務令苗民不受侵擾之
累地方緩急有備撫字得宜永享綏安之福也張映漢
原摺着發閱看將此諭令知之欽此仰見我

皇上惠愛民苗籌計安全之至意臣等跪讀之下欽服難

名伏查苗疆自嘉慶二年大兵戡定該處士民知身
家非兵勇莫衛兵勇非屯田莫養各願將田均出歸
公以資兵勇養贍前任辰永沅靖道傅鼐修碉築堡
挑丁練勇陸續丈收田土共一十三萬一千零六十

鳳凰廳志 卷之六
四畝六分分別給丁領種召佃收租經前撫臣阿林保等

奏定章程每年額征佃租七萬九百餘石以供屯防經費所有原設苗防之鄉勇士塘苗兵均皆停支鹽糧令其歸屯領田且耕且守計每年節省

國帑八萬二千餘兩糧米六千三百餘石以本地所生之財爲本地衛民之用洵屬籌邊良法嘉慶十四年又續丈出田土一萬餘畝每年征租五千六百餘石以爲加增書院義學試資等項之需教養兼施尤屬

美備復因辦公賞需變糶運脚折耗並催收租穀夫
馬盤費滙辦屯防檔冊津貼修整器具各項公食等
款支銷在所必需又續於正租之外征收餘租二萬
八千九百餘石以爲外銷經費每歲計征正餘租穀
十萬五千四百餘石遂致佃力拮据屢有拖欠嗣於
十九年前撫臣廣厚因苗疆租數過重征收難於足
額減去租穀五千五百石

奏明歲征租穀九萬九千九百餘石此苗疆設立屯防
定租供支之原委也臣左輔上年到楚體察情形苗

疆均屯田土皆多磽瘠以致水旱偶有不齊收成輒

形歉薄閭閻恒鮮蓋藏臣以田土固屬瘠薄若以人

工培治未嘗不可轉爲膏腴此在各屯弁等盡心勸

課自收實效並聞在屯委員日久玩生有以隨帶私

人頂補丁缺等弊當卽列款札飭辰沅道趙文在分

別詳細查辦適臣陳若霖到任欽奉

諭旨會同查議仰見

聖謨廣運凡所

指示悉屬邊防至計臣等遵卽會飭辰沅道趙文在及委

員永順府知府諸嘉杏永綏廳同知蔣紹宗湖北提
標中軍叅將鄭國鴻等按欵查明妥議詳覆一面將
屯官私補丁缺差役拘傳苗人及委員辦屯三款先
行禁革業經臣陳若霖附片奏蒙

聖鑒茲據該道等查明分欵籌議由藩司錢臻覆核議

奏前來臣等覆查苗疆未經戡定以前民人田產盡爲

苗佔自設屯以後各將田土均出歸公而苗人佔叛
田產亦俱呈繳入官多賴佃種官田以資餬口嘉慶

二十四五年疊逢旱歉各佃無力完租經前督撫臣

奏奉

恩旨俯准緩帶征還現在佃力拮据難以完納經臣等另行恭摺

奏懇蠲免臣等竊思苗疆治安日久生聚漸繁而該處田少山多地皆磽瘠小民水耕火耨終歲勤動所獲無多在豐稔之年收穫穀石除完納額租外僅敷口食本鮮餘畜一遇歉收卽形匱乏查屯防租穀自加餘租之後本屬較重現在若仍照額征收佃力實形

竭蹶自應大加酌減俾資事畜臣等與該道等悉心

酌核應請於額租內均勻減去穀一萬八千石並於
田土全行歸公及最爲瘠薄之區再減去二千七百
七十石實征租穀七萬九千餘石仍飭該道於屯弁
內挑選熟諳農務之員督率百總小旂人等勸課各
佃多開塘堰培治田土每歲收穫較盈著有成效加
以獎拔倘有任意荒蕪亦卽嚴行懲儆地利旣厚民
生自足其屯丁內並非均田本戶及出力丁勇子弟
或非土著之人概行革退遵照章程另行僉充佃租旣

減一切屯防經費尤宜撙節支銷咸歸實用所有苗
兵火藥及委員冗費等欸均應核實分別裁減其應
減去經費及餘穀二萬七百七十石每年實需支用
銀穀七萬九千餘石適符現議征租之數飭令該道
以後詳慎經理毋許稍有虛糜至苗疆儲備積貯銀
穀原爲緩急不時之需因歷年屯防經費不敷共動
缺銀穀六萬九百二十餘石現只存穀一萬七千五
百六十餘石臣等飭據該道趙文在與委員永順府
知府諸嘉杏等逐年逐欸詳加查核並無侵欺浮冒

現經_臣等另行恭摺

奏請借款歸補以實邊儲嗣後如有要需及歉年收租

絀額由道詳經_臣等

奏明再行借動如有虧挪霉變等弊應照常平倉儲之
例分別叅賠以昭慎重所有經管屯防佐雜委員均
已裁撤並將不協苗情之永順縣典史王允吉候補
縣丞陳樹梓咨部分別休革外一切經征支放悉歸
該道廳縣屯官經理嚴禁差役擅入苗寨拘傳苗人
如有勾攝等事遵照舊章由苗弁傳喚以符政體而

免擾累苗舉人歷科均未請咨進京會試現經查明
實因伊等自知文理平常難與各省貢士校藝是以
均未赴京應試並無胥吏勒索抑捐之事茲復籌議
添補膏火令苗舉人俱入書院肄業俟文理稍優於
照例給與公車銀兩外再行由道酌給盤費俾知奮
勵其不願會試者仍聽其便又苗疆遠處邊隅淮鹽
不能隨時運到若不量爲變通民苗誠有淡食之虞
然聽其買食私鹽又恐侵灌日甚於淮綱殊有關係
應請查照湖北歸州巴東等州縣之例如遇淮鹽不

能接濟聽民買食川鹽不得過十觔之數以便民食
而資調劑以上各條臣等悉心會籌逐一審計將屯
防欸目斟酌損益民苗利弊分別興除徭賦旣得輕
減支銷亦歸核實臣等仍諄飭該道督率廳縣實心
經理加意撫綏可期恒久不敝苗疆永遠相安以仰
副

聖主乂安邊圉之至意所有會查妥議緣由謹合詞恭摺
具

奏並將議覆各欸另繕清單敬呈

御覽刑部侍郎張映漢原摺謹附恭繳

謹將議覆苗疆事宜各條敬繕清單恭呈

御覽

一據刑部侍郎張映漢奏稱屯丁缺出委員屯官間以
隨帶私人頂充而屯丁子弟轉有不得充補者積年
累月必致均田全屬外來之人估據應查明仍令均
田等戶之子孫兄弟頂補以符舊章等語臣等查鳳
凰乾州永綏古丈坪保靖五廳縣額設屯丁七千名
經久章程案內

奏明於均田之本家及出力之丁勇內挑丁授田令其且耕且守奉爲世業洵屬寓兵於農之法凡遇屯丁辭退病故開除丁缺自應查照章程頂補不得以外人攙越惟嘉慶十九年永綏廳裁汰廳標額兵議令歸營拔補名糧其中不願入營之兵間有爲該廳及委員跟丁者求於屯防拔補丁缺經前署永綏廳同知李慶茂稟道准予拔補以致浮議漸生查汰兵原議歸營該署廳李慶茂率請拔補屯丁致佔丁缺有紊舊章該員業經病故應毋庸議其委員等間有亦以